

TUTÚ CÚÚ ÒÚ NÍ CADÚHA TÉ PÈLÚ

Té Pèlú cádúha-dé tutú quíhíⁿ ndaha ñáyiú sàndáá iní tnúhu Yá Ndiöxí

1 ¹Yúhú té Xímú, àdi Pelú chi úú òú-í, xínú cuèchi núú Xítóhó Jesucrìstú, chi mee-gă ní tendaha ñàha-gă xii-í xícá cùu-í càháⁿ-í tnúhu-gă. Te cādúha-í tutú-a sá cúú-xí nchàa nchohó ñáyiú sàndáá iní ñáhá xii-gă dàtná sàndáá iní-ndí-gă, te ducaⁿ chi Tătá-ó Dútú Ndiöxí ní dácàháⁿ-gă iní-ó nǐ sàndáá iní-ó-gă, chi cùu-gă Yaá ío váha quìde ndáá ndíhi Xítóhó Jesucrìstú Yaá dácăcu nihnu ñaha xii-o núú ùhú núú ndàhú. ²Te xicáⁿ táhù-í núú Yă Ndiöxí sá ùuⁿ-gă uuⁿ-gă ná cuíta chindee chitúu ñaha-gă xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gă chi ta cùtnuní-gă iní-ndó nàcuáa ndùu cuendá-gă, te ducaⁿ ta cùtnuní tucu iní-ndó nchàa nacuáa ndùu cuendá Xítóhó Jesucrìstú Yaá cúú Xítóhó-ó.

Nàcuáa quìde ñáyiú ndècu ichi Xítóhó Jesucrìstú

³Te Yá Ndiöxí ío càhnu cuu-gă chi chindee ñaha-gă xii-o quìde ndáá-ó ndècu-o datná cuìní mée-gă, te ducaⁿ chi cùtnuní iní-ó nàcuáa sàni iní Xítóhó Jesucrìstú Yaá ní cáháⁿ ñáhá xii-o. Te òré ní cáháⁿ ñáhá-gă xii-o te ní cutnùní iní-ó sǎ ío càhnu cuu-gă te ío váha quìde-gă. ⁴Te ducaⁿ nǐ cutnùní tucu iní-ó nàcuáa ní cáháⁿ-gă cada ñaha-gă xii-o, te tnúhu ní cáháⁿ-gă-áⁿ ío càhnu cuu-xi te ío váha, te nchoo nǐ sàndáá iní-ó tnúhu-áⁿ nùu xǎⁿ ñá túú-gă ndécú-ó ìchi cuehé ichi duha te ni ñá túú-gă sání ìní-ó càda-o nándi sá cuèhé sá dúhá, te ní cuu vii ní cuu váha iní-ó vítina. ⁵Te sá dúcáⁿ quìde-gă te xǎⁿ ío nducu ndè-ndo cada-ndo nchaa nacuáa càháⁿ-í-a, te nchòhó sàndáá iní-ndó-gă dico ñá dǐú mèe-ni xǎⁿ chi tnàhá xíní ñùhu-xi cada ndáá-ndó cùndecu-ndo. Te núu quìde ndáá-ndó ndècu-ndo te xìni ñùhu-xi tecú tnùní-ndó tnúhu-gă. ⁶Te núu tècú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sàcòo tñii mee-xi te xìni ñùhu-xi cunduu cahnu iní-ndó cuèi nándi sá ná yǎha-ndo cùndecu-ndo, te núu càhnu iní-ndó te xìni ñùhu-xi cada ndáá-ndó cùndecu-ndo datná cuìní mée Yă Ndiöxí cada-ndo. ⁷Te núu quìde ndáá-ndó ndècu-ndo, te xìni ñùhu-xi ío

cuu iní tnáhá ndì mee-ndo nacuaáa ndècu-ndo ichi-gá, te núu cùu iní tnáhá ndì mee-ndo te xìni ñuhu-xi cuu iní-ndó nchàa dava-gá tnàha ñáyi-ndo.

⁸Te núu sa ducaⁿ quìde-ndo ndecu-ndo te uuⁿ-gá cuita ducaⁿ càda-ndo quíhíⁿ núu cuàháⁿ núu vëxi, te núu ducaⁿ quìde-ndo te cùu-ndo cue ñáyi-ndo ñá túú dàna iní-xi xìndecu, te cuita cutnùnì-gá iní-ndó nchàa nacuaáa sàni iní Xítóhó Jesucristú quíhíⁿ. ⁹Te nchaa ñáyi-ndo ñá túú cuìní ducaⁿ càda cuú-yu ñáyi-ndo ñá túú tnàhí ndìxi túu iní-xi sá Yă Ndiöxí sa ní ndada ndoo ní ndada nine-gá iní-yu cuèndá nchaa sá cuèhé sá dúhá nǐ xóo cada-yu, te ñáyi-ndo áⁿ cúu-yu dàtná ìⁿ ñáyi-ndo cuàá àdi datná ìⁿ ñáyi-ndo ñá túú cùtnuní váha núu-xi, te ducaⁿ sãtnahá-xi cùu-yu cuèndá sá dúcáⁿ quidé-yu. ¹⁰Te xíãⁿ núu yúhú càháⁿ-í dóho nchaa nchòhó ñáyi-ndo ndècu ichi Xítóhó Jesucristú, te ío nducu ndèe-ndo cada váha-ndo cùndecu-ndo cuèndá cutnùnì ndáá iní-ndó sã Yă Ndiöxí ní cáháⁿ ñáhá-gă xii-ndo, te ducaⁿ nǐ quide-gá chi ducaⁿ nǐ cachí-gá cada-gá. Te vá ìⁿ ndùu canì iní-ndó dàña-ndo ichi-gá, te núu vá dáñá ndèe-ndó càda-ndo nchaa nacuaáa càháⁿ-í-a. ¹¹Te núu ducaⁿ na càda-ndo cundecu-ndo, te ío vii ío váha cada Yă Ndiöxí queheⁿ cuèndá ñáhá-gă xii-ndo òré ná sàá-ndó núu ndécú Xítóhó Jesucristú táxi tnùnì-gá nchaa nduu nchaa quíú, te diu-ni Yaá-ãⁿ cúu Xítóhó-ó te ní dácăcu nihnu ñaha-gă xii-o núu ùhú núu ndàhú.

¹²Te ducaⁿ-ni quíhi-í dandăcu iní ñáhà-í xii-ndo nchàa tnúhu càháⁿ-í-a cuèi sa xìnì-ndó tnúhu-áⁿ, te cuèi sàndáá váha iní-ndó nchàa tnúhu ndáá dăcuàha-ndo. ¹³Te yúhú quidé cuèndá-í sá ìo tàú-xi cáháⁿ-í dóho-ndo nìni ndecu-í ñuyú-a cuèndá sá vă năcuànaa-ndo nacuaáa cada-ndo cùndecu-ndo. ¹⁴Chi Xítóhó Jesucristú ní cachí-gá sá ñá túú-gă vâi nduu cundecu-í ñuyú-a te cuú-í. ¹⁵Te ío nducu ndèe-í nducu-í năcuáa cada-í cuèndá quendóo ndihi-ndo nchàa tnúhu càháⁿ-í-a, te cuèi na yăha cuú-í dico vá năcuànaa-ndo cada-ndo nchaa nacuaáa càháⁿ tnúhu sá dănèhé ñáhà-í xii-ndo vîtna.

Cue tée ní xiní núu sã ìo càhnu cuu Xítóhó Jesucristú

¹⁶Te sa ní dănèhé ñáhá-ndǐ xii-ndo sã ìo càhnu cuu Xítóhó Jesucristú. Te ní cachí tnúhu tucu-ndǐ năcuáa cada-gá òré quixi tucu-gá, te tnúhu-áⁿ cúu-xí tnúhu ndáá cuiti te ñá díú tnúhu sá nǐ sanì iní cue ñáyi-ndo ñuyú-a cùu-xi, chi nchúhú ní xiní núu-ndǐ năcuáa ní quide-xi cútnàhá ní cutnùnì iní-ndǐ sá ìo càhnu cuu Xítóhó Jesucristú. ¹⁷Chi dàvâ-áⁿ ìo váha ní quide Tătâ-ó Dútú Ndiöxí ní quide càhnu-gá Xítóhó Jesucristú, te diu-ni dàvâ-áⁿ nǐ cáháⁿ Dútú Ndiöxí ndéé andiu nǐ xáhaⁿ-gă xii Xítóhó Jesucristú: “Yòhó cúu-n Dêhe-í tée ío cùu iní-í, te ío cùdǐ iní ñáhà-í xii-n”, duha ní xáhaⁿ Yă Ndiöxí xii Xítóhó Jesucristú. ¹⁸Te nchúhú ní tecú dóho-ndǐ ní cáháⁿ Yă Ndiöxí ndéé andiu cùtnàhá ducaⁿ nǐ xáhaⁿ-gă xii Xítóhó Jesucristú, chi

tnàhá-ndí ndécú-ndí ndihi-gá yucu núú dúcáⁿ ñi quide càhnu ñaha Yá Ndiöxí xii-gá.

19Te ndècu ndihi-o nchaa tnúhu ní cáháⁿ cue téé ní xóo cáháⁿ tnúhu Yá Ndiöxí ndéé sanaha te nchaa tnúhu-áⁿ càháⁿ-xi nchaa nàcuáa cada-xi vitna, te cùtnuní iní-ó sã tnúhu ndáá cúú-xí, te xìni ñuhu-xi cada cuendá váha-ndo nchaa nacuáa càháⁿ tnúhu-áⁿ, chi tnúhu-áⁿ cúú-xí dàtná ìⁿ ñuhú dáyèhé-xi ndéé òré véxi túndaá quéné chòdíní cáhnú dáyehé-di. Te ducaⁿ sãtnahá-xi cùu tnúhu-áⁿ chi quide-xi nacuáa cutnùní iní-ó cuendá Xítoho Jesucristú. **20**Te xìni ñuhu-xi sá ïo-gá cada cuendá-ndó sã ñà túú ñáyiú tecú tnùní ni ìⁿ tnúhu sá ñi chídó tnùní cue téé ní cáháⁿ tnúhu Yá Ndiöxí ndéé sanaha, te núu Yá Ndiöxí vá cadá-gã nàcuáa cutnùní iní-yu nàcuáa càháⁿ nchaa tnúhu-áⁿ. **21**Te cue téé-áⁿ ïo ní xíndecu yiñuhu-güedé núú Yá Ndiöxí, te nchaa tnúhu sá ñi cáháⁿ-güedé-áⁿ ñà túú cùu-xi tnúhu sá ñi cahu iní méé-güedé, chi Espiritú Yá Ndiöxí ní dácáhu ìní ñáhá-xí xii-güedé nàcuáa cunduu tnúhu cáháⁿ-güedé.

Cue téé càchí sá càháⁿ tnúhu Yá Ndiöxí te ñá ndàá

2¹Te ndéé sanduu chi ní xíndecu cue téé ní xóo dandàhú ñáhá xii ñáyiú isràél càchí sá càháⁿ tnúhu Yá Ndiöxí te ñá ndàá sá càháⁿ-güedé tnúhu-gá, te ñi-ni ducaⁿ tucu cundecu cue téé dandàhú ñáhá xii-ndo vitna, chi cachí-güedé sá càháⁿ-güedé tnúhu Yá Ndiöxí te ñá ndàá. Te cue téé-áⁿ ïo yìdáhu cáháⁿ-güedé, te nchaa tnúhu cáháⁿ-güedé-áⁿ dacuïta nihnu ñaha-xi xii-ndo te núu na tédóho-ndo, chi cue téé-áⁿ vã ñunuu-güedé sá Xítoho Jesucristú ní xíhí-gá cuendá-güedé. Te sá dúcáⁿ càda-güedé ïo-gá ndíhi dacuïta nihnu-güedé méé-güedé. **2**Te vãi ñáyiú xínu iní-yu cadá-yu nándi sá cuèhé sá dúhá cuendá sá dúcáⁿ càda cue téé-áⁿ, te cuendá xíãⁿ ngóo ñáyiú cáháⁿ úhú-yu cuendá ichi Yá Ndiöxí. **3**Te mee-ni tnúhu sá ñi cahu iní cue ñáyiú ñuyíú-a danèhé ñáhá-güedé xii-ndo, te quesaha-güedé sá cúú-xí tnúhu ndáá te ñá ndàá cuendá-ni sá cuñaha-ndo dñhúⁿ xii-güedé, chi ñi-ni xíãⁿ tnàhí cuhuⁿ iní-güedé, dico Yá Ndiöxí sa ní cunaha ndècu túha-gá cuendá cada ndáá-gá cuèchi-güedé, te na sàá nduu te cuïta nihnu duuⁿ-güedé, chi Yá Ndiöxí vá nàcuànaa-gá ìⁿ sá ñi cachí-gá cada-gá.

4Te Yá Ndiöxí ñà túú ní quide cahnu iní-gá sá ñi quide cue espíritu ñà túú ní cùní cada ndáá xínu cuèchi núú-gã ní cùu, chi ní dáquihíⁿ ñáhá-gã xii-xi ìⁿ xichi núú ïo ndòho-xi ndecu-xi, te xíãⁿ cundedí nihnu-xi ndéé sáá nduu cuïta nihnu duuⁿ-ná-xi. **5**Te Yá Ndiöxí ñà túú ní quide cahnu tucu iní-gá nchaa sá ñi quide ñáyiú ñuyíú dñhna, chi dàvá-áⁿ ñi dándáá-gã ndute ñuyíú ñi cáhá nchaa ñáyiú ndècu ichi cuehé ichi duha te ìⁿ dñi-ni té Nòé ndíhi úsá-gá tucu cue ñáyiú cùu ndi mee-dé ní dácacu nihnu-gá. Te té Nòé-ãⁿ cúú-dé téé ní cáháⁿ dóho-yu nàcuáa cada váha-yu cundecú-yu ni

cùu te ñá túú ní cuíní-yu. ⁶Te Yá Ndiöxí ní dängává-gă ñuhú ní dánáá-gă ñáyiú ñuú Sòdomá ndihi ñáyiú ñuú Gòmorrá te mee-nă yáá nǐ nduu ñuú-áⁿ. Te sá dúcáⁿ nǐ cuu xíáⁿ cútnùní iní-ó nàcuáa cada ñaha Yă Ndiöxí xii nchaa ñáyiú ñá túú quide váha. ⁷Dico té Löt téé ní quide ndáá ní xíndecu ìíⁿ ñuú-áⁿ dàvá-áⁿ chi ní dácăcu nihnu ñaha-gă xii-dé. Te nchaa ñáyiú ñuú núú nǐ xíndecu-dé-áⁿ ìo ní xínduu cuihna ìní-yu, te mee-ni ìchi díí ìní ní xíndecú-yu, te sá dúcáⁿ nǐ xóo cadá-yu xíáⁿ ìo ní ndíhú iní té Löt. ⁸Te ìíⁿ nduu ìíⁿ nduu ní xóo cada ndàhú-xi iní té Löt-áⁿ cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndihi cuendá nchaa sá cuèhé sá dúhá nǐ xóo cadá-yu ní xóo quiní-dé, te mee-dě ní cuu-dé ìíⁿ téé ní xínduu vii ní xínduu váha iní-xi núú Yă Ndiöxí. ⁹Te sá dúcáⁿ nǐ yáha té Nöé ndihi té Löt, xíáⁿ cútnùní iní-ó să Yă Ndiöxí ìo chindee-gá cue ñáyiú quide ndáá ndécú ìchi-gá cuendá sá vă cadă-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí càchí-gá sá ncháá ñăyiú ndècu ichi cuehé ichi duha sa ndècu túha-yu sá quíhíⁿ-yu núú ùhú núú ndàhú nduu nà yáha cundáá cuéchi-yu.

¹⁰Te uuⁿ-gá cada ñaha Yă Ndiöxí xii nchaa cue téé ndècu ichi díí ìní, te dàquee tǐhú-güedě nchaa tnúhu sá sánú ìchi ñaha xii-o nacúaa cada-o cùndecu-o, te cùu-güedé cue téé ñíí iní-xi, te yíi ìní-güedé, te ñá túú yùhú-güedé cáháⁿ úhú-güedé cuendá nchaa espíritú cúnúu. ¹¹Te cue espíritú xínú cuèchi núú Yă Ndiöxí ìo cùnúu-xi dacúxí cuè téé-áⁿ, dico ñá túú cùyíi-xi cáháⁿ-xi dàtná càháⁿ cue téé-áⁿ òré ndàcáⁿ cuéchi-xi núú Yă Ndiöxí cuendá nchaa sá quidé cuè espíritú cùndíhi yucu ñávaha.

¹²Te nchaa cue téé dandàhú ñáhá xii-ndo-áⁿ cúú-güedě dàtná cue quiti, chi cue quiti-áⁿ ñă túú ndècu sá xíní tnùní-güedi, chi cue quiti-áⁿ nǐ cacu-güedi sá tníí-ó-güedi te cahni-o-güedi. Te ducaⁿ sätnahá-xi cùu nchaa cue téé-áⁿ, chi càháⁿ cuèhé-güedé cuendá ndédani càa espíritú cuèi ñá túú xíní-güedé ná espíritú cúú-xí, te diu-ni mee-güedě dăcuíta nihnu-güedé méé-güedě sá dúcáⁿ quide-güedé, ¹³te sáá nduu te nacháhu-güedé nchaa sá quidé-güedě-áⁿ, te cuèi nduu cuèi niú cúdíí ìní-güedé quidé-güedě nchaa núú să cuèhé sá dúhá sàni iní-güedé. Te òré nàtacá-ndó càda-ndo ìíⁿ vico chiñuhu-ndo Yá Ndiöxí te chitnahá ñáhá-güedě xii-ndo, te cada dusaⁿ-güedě sá cúdíí ìní-güedé sá dándàhú ñáhá-güedě xii-ndo, te dícó sácáⁿnúú cuăha ñaha-güedě xii-ndo dùcaⁿ na cada-güedé.

¹⁴Te nchaa cue téé-áⁿ òré xíní-güedé ìíⁿ ñáyiú dǐhí te ndíhi-ni sàni iní-güedé cáháⁿ ndihi ñaha-güedě xíi-yu, te ñá túú ndùu vétú iní-güedé cuendá nchaa sá cuèhé sá dúhá quide-güedé chi uuⁿ-gá uuⁿ-gá sání ìní-güedé cada-güedé. Te cuáháⁿ-güedé dándàhú-güedé nchaa ñáyiú ñá túú nihí ndéé càda ndáá cuendá canchicúⁿ nihnú-yu nchaa tnúhu càháⁿ-güedé. Te mee-ni nchàa sá ndécú ndíhi tnaha ñáyiú-güedé cúú ìní-güedé, te cue

tée-áⁿ cúu-güedë cue tée duuⁿ duuⁿ sa ní xíta nihnu núú Yă Ndiöxí. **15**Chi cùu-güedé cue tée vá cání-gă iní-xi cada ndáá, te nchícúⁿ nihnu-ná-güedé quidé-güedé nàcuáa ní xóo cada ndíi Bâlaám déhe ndíi Bèór, chi ndíi Bâlaám-áⁿ nǐ xóo tnahá iní ndíi cada ndíi chiuⁿ cuehé nàcuáa ní xóo níhí ndíi díhúⁿ. **16**Te Yă Ndiöxí ní quide-gá ní cáháⁿ bǔrru ndíi ní tenáá ñáhá-dí xii ndíi cuendá sá vǎ cádá ndíi ìⁿ cuéchi sàni iní ndíi cada ndíi ni cùu. Te sá dúcáⁿ nǐ cuu xǎⁿ ní nguítuu ndíi ñá túú ní quide ndíi ìⁿ sá ñà túú nàndíhi sàni iní ndíi ni cùu.

17Te nchaa cue tée ducaⁿ xǐquide cùu-güedé dàtná ìⁿ doco yìchí, te cùu tucu-güedé dàtná ìⁿ vícò sǎ xídó tǎchí te ñá túú dǎú nchídó-xí, te sa ndècu túha ìⁿ xichi núú ìo nee quíhíⁿ-güedé cundecu-güedé ni caa ni quíhíⁿ. **18**Te cue tée-áⁿ càháⁿ-güedé dàtná càháⁿ ìⁿ tée ío cùu cahnu dico ñá túú vèdana nàndíhi nchaa tnúhu càháⁿ-güedé, te cue tée-áⁿ dándàhú-güedé nchaa ñáyiu íchí nǐ dáñá ìchi cuehé ichi duha, te xǎhaⁿ-güedé xíi-yu sá cúu-ní càdá-yu nchaa sá cuèhé sá dúhá quide nchaa ñáyiu ndècu ichi díí ìní, **19**te xǎhaⁿ tùcu-güedé sá cúu-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñáyiu ñá ndácú dàña nándi sá cuèhé sá dúhá cùu-yu dàtná ìⁿ ñáyiu xínu cuechi ñá túú tnàhí dàñá quee núú chíúⁿ pàtróóⁿ-xi. Te ducaⁿ sǎtnahá-xi cùu-yu chi ñá ndácǔ-yu dàñá-yu nándi sá cuèhé sá dúhá quidé-yu. **20**Te núu ñáyiu sa ní dáñá nchàa ichi cuehé ichi duha cuendá sá nǐ cutnùní iní-yu nàcuáa ndùu tnúhu Xítóhó Jesucrìstú, Yaá ní dácǎcu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vâa-gá tucu cadá-yu dâcúúxí dàtná ní xóo cadá-yu cútnàhá vátá cútnùní-gá iní-yu nàcuáa ndùu tnúhu-gá. **21**Te váha-gá sá vǎ ngǔnu ichí-yu ichi ndáá ní cùu te ñá díú sǎ sà ní ngúnu ichí-yu te ní dáñá-yu nchaa tnúhu-gá sá sà ní níhí-yu ndècu ndíhí-yu sànu ichi ñaha-xi nacuáa cundecú-yu ni cùu. **22**Te ñáyiu ducaⁿ xǐquide quee ndáá-xi nàcuáa cuáháⁿ ìⁿ cuendú sá càchí-xi: “Iná ní nacaxi-dí sá nǐ ndusaⁿ-dì, te cùchí quiti íchí nǐ xichi ndute cándoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuendú-áⁿ.

Xítóhó Jesucrìstú quixi tucu-gá

3 **1**Te nchaa nchòhó ñáyiu ío cùu iní-í cùtnuní iní-í sá ìo váha sàni iní-ndó, te xéhe cúu-xí tùtú cúu ùú cádǔha-í sá cúu-xí-ndó, te ìⁿ-ni càháⁿ-í dándàcu iní ñáhà-í xii-ndo nchàa tnúhu sá sà ní xíndedóho-ndo. **2**Chi cuiní-í sá vǎ nàcuànaa-ndo nchaa tnúhu ní cáháⁿ nchaa cue tée ní xóo cáháⁿ tnúhu Yă Ndiöxí ndéé sanaha, te ni vǎ nàcuànaa-ndo nchaa tnúhu ní cáháⁿ cue tée ní cáháⁿ tnúhu Xítóhó Jesucrìstú Yaá ní dácǎcu nihnu ñaha

xii-o núú ùhú núú ndàhú, chi ñi nchaa tnúhu-áⁿ sánú ìchi ñaha-xi xii-o nacuáa cada-o cùndecu-o.

³Te ío-gá xíní ñùhu-xi cutnuni iní-ndó nàcuáa cada-xi òré vátá sàá-gá nduu quixi tucu Xítohó Jesucristú ñuyíú-a, te cächí tnúhu-í xii-ndo sã cùndecu ñáyiú cuhuⁿ iní mee-ni nchàa sá cuèhé sá dúhá te mee-ni xǎⁿ cadá-yu, te cáháⁿ cuèhé cáháⁿ duhá-yu cuèndá tnúhu Yá Ndiöxí. ⁴Te cachí-yu: “Ñá ndàá sá quixí Xítohó Jesucristú ñuyíú-a, chi núú quixi-gá te sá ndéé ama-gá sa ní quexìo-gá ní cùu. Te dàtná-ni quide-xi vitna ñi-ni duha ní quesaha-xi quide-xi ndéé cùtnàhá ní ngáva ñuyíú, te ñi-ni duha quide-xi ndéé cùtnàhá ní xìndecu cue ñaní tnàhá-ó ndéé sanaha, te ñi-ni duha quide-xi ndéé ní sáá nduu ní xíhí-güedé, te ñi-ni duha quide-xi ndéé vitna”, duha cáháⁿ-yu. ⁵Te ñucùⁿ cadá-yu vá cadá cuèndá-yu sá Yá Ndiöxí ní cáháⁿ-gá te ní ngùndecu andiú ndíhi ñuyíú-a, te ñi-gá ní quide ní quene ñuhu yìchí xití ndute ní ngùndecu-xi ñiⁿ xio. ⁶Te ñiⁿ xito ní dándáá Yá Ndiöxí ndute ñuyíú-a ní dánáá-gã nchaa sá ío. ⁷Te Yá Ndiöxí ní cachí-gá sá cùndecu-ni ñuyíú-a ndíhi andiú ndéé ná sàá nduu càda-gá nchaa nàcuáa ní cáháⁿ-gá sá cúú-xí nchàa ñáyiú ndècu ìchi cuehé ìchi duha, te dàvá-áⁿ danàa-gá nchaa ñáyiú-áⁿ chi cáyú andiú ndíhi ñuyíú-a.

⁸Te nchaa nchòhó ñáyiú ío cùu iní-í, ío cuhuⁿ iní-ndó tnúhu na càháⁿ-í-a, chi Yá Ndiöxí ñá túú sàni iní-gá dàtná sání ñi mee-ó, te ñiⁿ nduu cùu-xi datná úxí cièndú cuíá, te úxí cièndú cuíá-ãⁿ cúú-xí dàtná ñiⁿ nduu sá cúú-xí-gã. ⁹Te Yá Ndiöxí ñá túú dàna ndodo iní-gá vá cadá-gã ñiⁿ sá càháⁿ-gá dàtná cächí cue ñáyiú sá dáná ndòdo iní-gá cada-gá ñiⁿ sá càháⁿ-gá, chi ñucùⁿ tnahí dàcaca-gá nduu cuèndá sá ío cùndahú iní ñàhá-gã xii-o, te cuìní-gá sá ncháá ñáyiú ndixi túú iní-yu sá ñà túú quide váha-yu ndècú-yu te tuhá-yu ìchi-gá, te ducaⁿ quide-gá chi cuìní-gá sá vã cuíta nihnu ni ñiⁿ-yu.

¹⁰Te dàtná quidé cue ñadúhú quíhu-güedé ñiⁿ vehe dùhu-güedé òré ñá túú yìhi iní xítohó vehe-áⁿ, te ducaⁿ càda Xítohó Jesucristú chi nduu ñà túú yìhi iní ñáyiú ñuyíú-a quixi tucu-gá, te dàvá-áⁿ cada-xi andiú dàtná quidé-xí òré níhi vìhi caháⁿ ñúhu, te ñi-ni òré-áⁿ ndoñuhu àndiú, te cáyú nchaa chódíní, te cáyú tucu tnàhá ñuyíú-a ndíhi nchaa sá ío.

¹¹Te vitna nchòhó sa xíní-ndó sã náá ñuyíú-a te xǎⁿ ío xini ñuhu-xi cada váha-ndo cùndecu-ndo, te cada-ndo nàcuáa cuìní mee Yá Ndiöxí cunduu. ¹²Te ío nducu ndèe-ndo ducaⁿ cada-ndo cuèndá ducaⁿ ndíhi-ni sáá nduu càda-gá nchaa nàcuáa càháⁿ-gá, te ducaⁿ nchòhó cundecu túha-ndo sãá nduu-ãⁿ. Te ñi-ni nduu-ãⁿ ndoñuhu àndiú chi cáyú-xi, te ñi-ni ducaⁿ ndoñuhu tucu nchaa chódíní chi ndíhi-dí cáyú. ¹³Te nchoo ndètu-o sáá nduu cùndecu-o ñiⁿ ñuyíú sáá, te quíní-ó ñiⁿ andiú saa datná ní cachí Yá Ndiöxí, te yàcáⁿ chi mee-ñã cue ñáyiú quide váha cundecu.

14Te nchòhó ñáyiú ío cùu iní-í, nini ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sá vǎha cundecu-ndo ìchi Yá Ndiöxí, te cundecu nahi-ndo, te cada-ndo nchàa nacuaáa vá cùndècu cuéchi-ndo nǎú-gǎ. 15Te ío cada cuendá-ndó sǎ dàcaca-gá nduu dùcaⁿ cada-gá chi cuení-gá sá ncháá ñáyiú naníhí tàhú-yu. Te té Pǎblú téé ío cùu iní-ó ndècu ndihi-o ichi Xítóhó Jesucrístú diu-ni nàcuáa càháⁿ-í-a diu-ni ducaⁿ nǎ tee-dé ìⁿ núú tùtú ní dáquixí-dě ndaha-ndo, te ní tee-dé nàcuáa ní dácáhú ìní ñáhá Yǎ Ndiöxí xii-dé. 16Te diu-ni ducaⁿ càháⁿ-dé nchaa dava-gá núú tùtú cǎdǔha-dé, te dava tnúhu càháⁿ-dé ío úhú tecú tnùn-ó, núú xǎⁿ ñáyiú ñá túú cùtnuní váha iní-xi, ñáyiú ío yáchí sàndáá iní-xi ìⁿ tnúhu, ñáyiú-áⁿ tècú tnùn-ó dǎtní-yu nchaa tnúhu ní chídó tnùn-ó, ndihi nchaa dava-gá tnúhu yòdo tnuní núú tùtú Yǎ Ndiöxí, te sá dúcáⁿ quidè-yu te dacuítá nihnú-yu mée-yu.

17Te nchòhó ñáyiú ío cùu iní-í, sa cùtnuní iní-ndó nàcuáa quide dava ñáyiú, núú xǎⁿ ío xìni ñuhu-xi quihi iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mée-ndo dandahú ñáhá nchàa cue téé ndècu ichi cuehé ichi duha, chi cue téé-áⁿ ñà túú sàni váha iní-güedé cuendá tnúhu Yá Ndiöxí. Te núú na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ìchi-gá dǎtná ndécú-ndó vitna. 18Te nchòhó uuⁿ-gá uuⁿ-gá cuita cutnùn-ó iní-ndó quǎhíⁿ nchaa nàcuáa ta chindee ñaha Xítóhó Jesucrístú xii-ndo cuǎháⁿ. Te ducaⁿ ño-gá cuita cutnùn-ó iní-ndó nchàa nacuaáa sàni iní-gá, te diu-gá cúú-gǎ Yaá ní dácǎcu nihnu ñaha xii-o núú ùhú núú ndàhú. Te chí ná càchí-ó sǎ ío càhnu cuu-gá cuèi vitna té cuèi ndéé núú cuàháⁿ núú vǎxi. Te ducaⁿ na cùnduu. Te ío chí cǎdá ndèe iní-ñǎ vitna.